

周易消息

四

蘇平知
PDG

周易消息卷五

烏程後學紀 磊推

下篇

說見上篇

三三

艮下兌上

咸亨利貞取女吉

取去聲

咸消卦也自井來也

困反

八月之卦坤爲咸咸感也謂

剛感而柔爲所感也以二伏名也二坤四伏乾三也

坤四卽五乾四乾三卽五伏坤三乾四并四伏也乾

三并五也乾四動之五合坤三乾三動之二伏合坤

四三四交易剛感柔應乾三體艮坤四體兌艮爲山

兌爲澤故卦艮下兌上有山上有澤之象故爲咸咸
以來言也剛柔應爲亨乾爲利五爲貞兌爲女息爲
吉取婦曰取自亨以下皆以二伏乾三言也乾三卽
五伏坤三乾三井五也坤三井三伏也乾三動之二
伏合坤四坤三動之五伏合乾四三四交易剛柔相
應故亨利貞取女吉女謂二坤四坤四體兌井二伏
也此咸之象也故曰咸亨利貞取女吉

初六咸其拇

咸初坤初伏乾五也坤自井上來乾卽井初伏也坤
動之渙上伏合乾四乾動之渙二合坤四初以往言
也坤爲咸震爲拇拇足大指也咸謂坤初拇謂五乾

四乾四體震坤初動之上伏合乾四故爲咸其拇此初之象也故初六曰咸其拇

六二咸其腓凶居吉

咸二坤四伏乾三也坤卽井二伏來乾自井五來伏也坤動變渙二伏合乾五乾動之渙初伏合坤三咸其腓以來言也艮爲腓消爲凶腓足肚也咸謂坤四腓謂伏乾三乾三體艮坤四井二伏也乾三井五也坤四動變咸二合乾三故爲咸其腓咸其腓故凶居吉以往言也坤爲居息爲吉居謂坤四吉謂初伏乾五乾三動之初伏合坤三坤四動變二伏合乾五故居吉此二之象也故六二曰咸其腓凶居吉

九三咸其股執其隨往吝

咸三乾二伏坤上也乾自井二來坤自井五伏來也
乾動變渙三伏合坤二坤動之渙四合乾初三以往
言也坤爲咸爲隨巽爲股艮爲執咸其股二句以伏
坤上言也坤上卽上伏乾上咸其股謂坤上坤上動
之四合乾初乾初伏體巽故爲咸其股執其隨謂上
伏乾上乾上體艮動之五合坤五坤五卽四乾初伏
也故爲執其隨坤爲往爲吝往吝以乾二言也坤上
動之四合乾初乾二動變三伏合坤二故往吝此三
之象也故九三曰咸其股執其隨往吝

九四貞吉悔亡憧憧往來朋從爾思

咸四乾初伏坤五也乾自井三來坤自井初來伏也
乾動變渙四伏合坤上坤動之渙五伏合乾上貞吉
悔亡以來言也乾爲貞息爲吉坤爲悔貞謂乾初悔
謂伏坤五乾初井三也坤五井初也乾初動之四合
坤五故爲貞吉悔亡憧憧往來以下以往言也坎爲
憧坤爲往乾爲來憧憧重象心往來不寧貌往謂乾
初來謂上伏乾上初上皆體坎乾初動變四伏合坤
上乾上動之五合坤五故爲憧憧往來兌爲朋坤爲
從爲思朋謂三乾二乾二體兌思謂上坤二坤二體
坤乾上動之五合坤五坤二動之三合乾二坤二卽
乾上合也故爲朋從爾思此四之象也故九四曰貞

吉悔亡憧憧往來朋從爾思

九五咸其脢无悔

咸五乾四伏坤三也乾自井四伏來坤自井三伏來也乾動之渙上合坤初坤動之渙初合乾三五以來言也坤爲咸爲悔艮爲脢脢背肉也咸謂上坤二脢謂上伏乾上乾上體艮无悔謂五乾四乾四井四坤二伏也坤二動之上合乾上乾四動之五合坤三故爲咸其脢无悔此五之象也故九五曰咸其脢无悔上六咸其輔頰舌

咸上坤二伏乾上也坤自井四來乾卽井上伏也坤動之渙三合乾二乾動之渙五合坤五上以往言也

坤爲咸爲輔頰兌爲舌咸謂四伏坤五輔頰謂上坤
二舌謂上伏乾上乾上伏體兌坤五動之五伏合乾
上故爲咸其輔頰舌此上之象也故上六曰咸其輔
頰舌

彖傳咸感也柔上而剛下二氣感應以相與止而說男
下女是以亨利貞取女吉也天地感而萬物化生聖人
感人心而天下和平觀其所感而天地萬物之情可見
矣

說音悅

乾爲咸感謂剛感而柔爲所感也以二伏乾三言也
乾三井五也動之二伏合坤四以剛感柔而柔爲所
感故爲咸感也此釋卦名也詳見下坤爲柔爲應乾

爲剛爲氣爲感爲與柔謂二坤四坤四卽五乾四剛
謂二伏乾三乾三卽五伏坤三乾四并四伏也乾三
并五也乾四體兌乾三體艮兌爲澤艮爲山氣謂山
澤之氣也以剛言也乾四動之五合坤三乾三動之
二伏合坤四三四交易故爲柔上而剛下二氣感應
以相與艮爲止爲男兌爲說爲女止而說以五伏坤
三言也坤三上合乾四坤三體艮乾四體兌故爲止
而說男下女以二伏乾三言也乾三上合坤四乾三
體艮坤四體兌故爲男下女柔上而剛下二氣感應
以相與止而說男下女此感之所以亨利貞取女吉
也此釋彖辭也下乃推言之乾爲天坤爲地艮爲萬

物兩爲化息爲生天謂四乾初乾初體乾地謂三乾
二乾二體坤乾初并三也乾二并二也乾初之四乾
二之三三四交合三卽四伏故爲天地感萬物謂二
五也五乾四二坤四乾四并四伏也坤四并二伏也
乾初之四乾四之五乾二之三坤四之二坤四卽乾
四四體艮故爲天地感而萬物化生乾爲聖坤爲人
坎爲心聖人感人心亦謂三四也四乾初伏坤五也
三乾二伏坤上也乾初并三也乾二并二也坤五并
初也坤上并五伏也乾初動之四合坤五乾二動之
三合坤上五上皆體坎故爲聖人感人心坤爲天下
兌爲和均爲平天下和平謂初上也初坤初伏乾五

也上坤二伏乾上也坤初卽四乾初井上也坤二卽
三乾二井四也乾初動之四合坤五坤初動之初合
乾五乾二動之三合坤上坤二動之上合乾上剛柔
交易上下適均故爲聖人感人心而天下和平乾爲
觀爲感觀其所感總上數句以五言也五乾四伏坤
三也觀謂乾四所感謂伏坤三乾四井四伏也坤三
井三伏也乾四動之五合坤三坤三卽二伏乾三故
爲觀其所感乾爲天坤爲地爲情爲見艮爲萬物天
地之情謂初上也萬物之情謂二也初坤初卽四乾
初井上也上坤二卽三乾二井四也二坤四卽五乾
四井二伏也坤初之初坤二之上坤四之二初體乾

二體坤四體艮故爲觀其所感而天地萬物之情可見矣此統釋咸彖也故曰咸感也柔上而剛下二氣感應以相與止而說男下女是以亨利貞取女吉也天地感而萬物化生聖人感人心而天下和平觀其所感而天地萬物之情可見矣

象傳山上有澤咸君子以虛受人

山上有澤以來言也艮爲山兌爲澤山謂二伏乾三乾三體艮澤謂二坤四坤四體兌乾三井五也坤四井二伏也乾三動之二伏合坤四故爲山上有澤山上有澤剛感柔應咸之象也故爲咸故曰山上有澤咸君子以虛受人以往言也艮爲君子君子謂二伏

乾三也乾三體艮以謂以變也坤爲虛爲受爲人虛
謂二坤四人謂初伏乾五乾三動之初伏合坤三坤
四動變二伏合乾五故爲君子以虛受人此咸變渙
之象也故曰君子以虛受人

咸其拇志在外也

坤爲志乾爲外志謂坤初坤初動之上伏合乾四故
爲志在外故曰咸其拇志在外也

雖凶居吉順不害也

坤下爲順上爲害順不害謂坤四坤四動變二伏合
乾五故爲順不害故曰雖凶居吉順不害也

咸其股亦不處也志在隨人所執下也

下爲處不處謂伏坤上也亦承上伏乾上言也坤上
卽上伏乾上乾上動之五合坤五坤上動之四合乾
初故爲亦不處坤爲志爲人爲隨爲下志在隨人謂
四伏坤五也坤五動之五伏合乾上故爲志在隨人
志在隨人故所執下也故曰咸其股亦不處也志在
隨人所執下也

貞吉悔亡未感害也憧憧往來未光大也

乾爲感坤爲害未感害以乾初言也乾初未變合坤
上故爲未感害坤爲光乾爲大未光大以伏坤五言
也坤五動之五伏合乾上乾初動變四伏合坤上故
爲未光大故曰貞吉悔亡未感害也憧憧往來未光

大也

咸其脢志末也

坤爲志上爲末志謂上坤二坤二并三乾四伏也動之上合乾上故爲志末故曰咸其脢志末也

咸其輔頰舌滕口說也

水涌曰滕滕上也謂伏乾上乾上體坎兌爲口口謂坤二坤二卽乾二體兌乾上動之五合坤五故爲滕口說故曰咸其輔頰舌滕口說也

三三

巽下
震上

恆亨无咎利貞利有攸往

恆息卦也自困來也

井反

二月之卦坤爲恆恆久也謂

久于其位也以五伏名也五坤三伏乾四也坤三卽二乾三乾四卽二伏坤四乾三困三伏也乾四困二也乾三動之二合坤四乾四動之五伏合坤三坤三卽困五伏也三四交易久于其位乾四體震坤三體巽震爲雷巽爲風雷變爲風故卦巽下震上有雷風之象故爲恆剛柔應爲亨坤爲咎乾爲利五爲貞恆亨无咎利貞以來言也皆以五伏乾四言也乾四困二也動之五伏合坤三坤三卽二乾三乾四卽二伏坤四三四交易三見于上四伏于下剛柔相應故亨无咎利貞乾爲利坤爲往利有攸往以往言也以三乾上言也乾上卽初伏乾初乾上動變三伏合坤初

乾初動之二合坤二初上交易此消彼息故利有攸
往此恆之象也故曰恆亨无咎利貞利有攸往

初六浚恆貞凶无攸利

恆初坤五伏乾初也坤自困三來乾卽困初伏也坤
動之節四合乾五乾動之節二合坤三初以往言也
坎爲浚浚通濬疏濬也坤爲恆浚謂坤五恆謂四乾
五坤五動之四合乾五五體坎上下皆坎故爲浚恆
乾爲貞爲利消爲凶浚恆故貞凶无攸利此初之象
也故初六曰浚恆貞凶无攸利

九二悔亡

恆二乾三伏坤四也乾自困三伏來坤自困四伏來